

中國古典文學叢書

吳梅村全集



〔清〕吳偉業著

李學穎集評標校

中

中國古典文學叢書



〔清〕吳偉業 著 李學穎 集評標校

吳梅村全集

中國古典文學叢書




下



(全三冊)

1·26 精裝定價:82.90 元

ISBN 7-5325-0121-3



9 787532 501212 >

〔清〕吳偉業著 李學穎集評標校

吳梅村全集

中

上海古籍出版社

〔清〕吳偉業 著 李學穎 集評標校

吳梅村全集

下

上海古籍出版社

吳梅村全集卷第十九 詩後集十一

七言絕句七十一首

下相極樂菴讀同年北使時詩卷

蘭若停驂灑墨成，過河持節事分明。
上林飛雁無還表，頭白山僧話子卿。

過昌國

樂生去國罷登壇，長念昭王知己難。
流涕伐燕辭趙將，忍教老死在邯鄲？

任丘

回首鄉關亂客愁，滿身風雪宿任丘。
忽聞石調邊兒曲，不作征人也淚流。

臨清大雪

白頭風雪上長安，短褐疲驢帽帶寬。辜負故園梅樹好，南枝開放北枝寒。

【評】

漸曰：將排律卽事言懷縮于二十八字之中，故是極筆。

阻雪

關山雖勝路難堪，纔上征鞍又解驂。十丈黃塵千尺雪，可知俱不似江南。

送王玄照八首

〔二〕王善畫，兗州先生曾孫，偶來京師，舊廉州太守也。

青山補屋愛流泉，畫裏移家就輞川。添得一舟乘興上，煙波隨處小游仙。

其二

始興公子舊諸侯，丹荔紅蕉嶺外游。席帽京塵渾忘卻，被人強喚作廉州。〔三〕

其三

報國松根廟市開，公侯車馬鬪如雷。疲驢一笑且歸去，刑部街前曾看來（三）。

其四

內府圖書不計錢，漢家珠玉散雲煙。而今零落無收處，故國興亡已十年。

其五

布衣懶自入侯門，手跡流傳姓氏存。聞道相公談翰墨，向人欲訪趙王孫。

其六

朔風歸思滿蕭關，筆墨荒寒點染間。何似大癡三丈卷，萬松殘雪富春山？

其七

河北三公一紙書，浪游何處曳長裾？歸田舊業春山盡，華子岡頭自釣魚。

其八

五馬南來韋使君，故人相見共論文。酒闌面乞黃堂俸，明日西山買白雲。

【校】

〔二〕題四十卷本、鄒鈔、篋衍均作「送王玄照還山」。鄒鈔選第一、六首，感舊、篋衍選第二、四、六首，均無題下注。

〔三〕篋衍篇末有小注「王曾爲廉州」。

〔三〕四十卷本篇末有小注「刑部街，舊廟市開處也」。

讀史偶述四十首〔二〕

射得紅毛兔似拳，乳茶桐酒閣門前。相公堂饌銀盤美，熊白烹來正割鮮。

其二

雪消春水積成渠，芻蕘如山道不除。怪殺六街騶唱少，只今驄馬避柴車。

其三

新更小篆譯蟲魚，乙夜橫經在玉除。訝道年來親政好，近前一卷是尙書。

其四

直廬西近御書房，插架牙籤舊錦囊。燕寢不須龍鳳飾，天然臺几曲迴廊。

其五

閣門春帖點霜毫，玉尺量身賜錦袍。聞道尙方裁製巧，路人爭擁看枚臯。

其六

龍媒剪拂上華茵，嚴助丹青拜詔新。莫向天閑誇絕技，白頭韓幹竟何人？

其七

徐無城下遇神仙，移得驪山近玉田。賭射上林春宴罷，諸王騎馬向湯泉。

其八

新張錦幄間垂楊，四角觚稜八寶裝。藉地煖茵趺坐軟，茸茸春草是留香。

其九

騰黃赭白總追風，八匹牽來禁苑中。毛骨不殊聲價好，但看騎上卽神龍。

其十

側坐翻身馬上輕，官家絕技羽林驚。
左枝忽發鳴髀箭，仰視浮雲笑絕纓。

其十一

柳陰觀射試期門，撥去胡牀踞樹根。
徙倚日斜纔御輦，天邊草木亦承恩。

其十二

進呈文字費躊躇，轉譯紛然混魯魚。
夜半相公還被詔，御前帖子改翻書。

其十三

新語初成左右驚，一言萬歲盡歡聲。
多應絳灌交歡久，馬上先行薦陸生。

其十四

東盡三韓北嫩江，秋風傳箭海西降。
玄狐獵罷搜青鼠，射得頭鵝更一雙。

其十五

五千鐵騎十三山，太子河邊飲馬還。
前哨已踰歡喜嶺，鼓聲西下震榆關。

其十六

松林路轉御河行，寂寂空垣宿鳥驚。
七載金滕歸掌握，三百僚車馬會南城。

其十七

海上奇毛固絕倫，星眸玉爪出精神。
蘆溝橋上秋風起，一簇紅塵鷹犬人。

其十八

西洋館宇逼城陰，巧曆通玄妙匠心。
異物每邀天一笑，自鳴鐘應自鳴琴。

其十九

迴龍觀裏海棠開，禁地無人閉綠苔。
一自便門馳道啓，穿宮走馬看花來。

其二十

宣爐廠盒內香燒，禁府圖書洞府簫。
故國滿前君莫問，淒涼酒盞鬪成窰。

其二十一

布棚攤子滿前門，舊物官窰無一存。
王府近來新發出，剔紅香盒豆青盆。

其二十二

大將祁連起北邙，黃腸不慮發丘郎。
平生賜物都燔盡，千里名駒衣火光。

其二十三

琉璃舊廠虎房西，月斧修成五色泥。
遍插御花安鳳吻，絳繩扶上廣寒梯。

其二十四

平生馬草世人知，垂老猶堪萬里馳。
卻怪杏山書到日，三軍早哭道旁碑。

其二十五

金魚池上定新巢，楊柳青青已放梢。
幾度平津高閣上，泰壇春望記南郊。

其二十六

紛紛茗酪鬪如何？點就茶經定不磨。
移得江南來禁地，迴龍小盞潑松蘿。

其二十七

夜半齋壇唱步虛，玉皇新築絳霄居。
吹笙盡是黃門侶，別勅西清註道書。

其二十八

新題御墨賜孱顏，紫禁城頭喚景山。
傳與外廷誇勝事，蓬瀛小島在人間。

其二十九

水雲樹上會神仙，層閣黃龍十丈船。
三爵羣臣半霑醉，榴花開宴自今年。

其三十

蘭池落日馬蹄驚，魚服揮鞭過柳城。
十萬羽林空夜直，無人攬轡諫微行。

其三十一

七寶琉璃影百層，淪漪月色漾寒冰。
詞臣主客詩圖進，御帖親題萬壽燈。燈成，命編翰製

詩聯，勅賜燈名「萬壽」。〔三〕

其三十二

玉砌流泉繞碧渠，晚涼紈扇軟金輿。
采蓮蝶子江南弄，太液池頭看打魚。

其三十三

龍文小印大如錢，別署齋名自記年。
畫就煙雲填寶篆，欲將金粉護山川。

其三十四

渭園千里送簫簫，嫩籜青青道正長。
夜半火來知走馬，尙方藥物待新篁。

其三十五

新設椒園內道場，雲堂齋供自焚香。大官別有伊蒲饌，親割鸞刀奉法王。

其三十六

直廬起草擅能文，被詔含毫寫右軍。賜出黃驄銀鑿落，天街徐踏墨池雲。

其三十七

霜落期門喚打圍，海青帽煖去如飛。鴛鴦信至纔遊幸，不比和林避暑歸。

其三十八

鵲錦袋出懷中，玉粒交爭花毯紅。何似平章荒葛嶺，諸姬蟋蟀鬪金籠？

其三十九

綠翹聰慧換新妝，比翼丹山小鳳皇。巧舌能言金鎖愛，賜緋妬殺雪衣娘。廣陳進朱鸚鵡，